

BOEKBESPREKING

Communism, its faith and fallacies deur James D. Bales. Uitgewers: Baker Book House, Grand Rapids 6, Michigan, U.S.A., 1962. Prys \$3.95.

Hierdie kostelike boek van professor Bales kan ons van harte aanbeveel. Dis een van die beste en mees insiggewende werke oor Kommunisme wat ek nog ooit gelees het. In die voorwoord verklaar Herbert Philbrick, wat self jarelank 'n kommunist was dat Bales „has gone to the very root, the heart and soul of communism itself, to learn not only *what* a communist does, but *why* a communist behaves as he does”.

Dr. Bales is 'n jarelange student in verband met Kommunisme en hy kwoteer in sy boek uit 'n baie breë litteratuur, waarin hy die Kommunisme self laat praat uit hul eie verklarings, publikasies, manifeste ens.

Daarby is Bales 'n positief belydende Christen en gee hy 'n nugtere en gebalanseerde oordeel oor die kommunistiese strewe, wat dit nogtans in al sy akelige werklikheid voor ons oë ontvou.

Sy definisie van Kommunisme gee hy soos volg: „It is a Marx inspired, Moscow directed, international criminal conspiracy against civilization based on a God-denying philosophy of life, sustained by faith in the dialectic, backed by the devotion of its fanatical believers and to an uncertain extent by the armed might of the Red Armies”.

Hy wys op die filosofie van die Kommunisme. Hy sê dat elke kommunist homself beskou as gewikkel in 'n stryd tot die dood toe met alle nie-kommuniste. As die kommunist om 'n konferensietafel kom plek inneem, dan het hy net één doel in die oog en dit is om die samespreking te gebruik om die totale ondergang van sy teëstanders te bewerkstellig. En hy beskou homself aan geen enkele etiese kode van waarheid en geregtigheid gebonde nie. *Alles* is goed en reg wat die Kommunisme dien. Dis die *enigste* maatstaf.

Bales wys op die ateïsme van die Kommunisme, wat alles verklaar as die bloot toevallige gevolge van die blinde natuurkragte wat uit die materie opkom. Tog glo hulle dat daar 'n vaste lyn van ontwikkeling is wat met onfeilbare sekerheid moet lei tot die uiteindelijke koms van die Kommunistiese heilsstaat.

Verder is veral vir ons van groot belang wat Bales betoog oor hoe die Kommunisme oral die rewolusiegees aanwakker en alle denkbare griewe van mense probeer uitbuit om die wêreld in chaos te dompel. Ook

wys hy daarop hoedat niksvermoedende en goedbedoelende mense en groepe, allerlei sg. Fronte of Arbeidsunies ens. deur die Kommuniste om die bos gelei en vir *hulle* doeleindes gebruik word, waaronder daar 'n groot aantal kerklike leiers en sg. intellektueles is. Ook wys hy aan hoedat die kommuniste dit teëwerk dat daar werklik iets tot voordeel van minderbevoorregte of agterlike mense en volke gedoen word. Hulle wil chaos hê en nie vooruitgang nie. Die massas moet nie dankbaar en tevrede gestem word nie, dan is hulle ongeskik vir die bloedige en rewolusionêre omkering van die kapitalistiese en Christelike orde. So word dit duidelik waarom ook ons land vandag so gehaat word en ons beleid van afsonderlike ontwikkeling so verfoei word en dat die blankes wat so begaan is oor die „onderdrukking” van die gekleurde bevolking, eintlik meehelp om die mense se graf te grawe en reg in die hande van die Kommunisme te speel.

Hierdie boek van Bales behoort deur *elke* Afrikaner, blanke en gekleurde, gelees te word. Dan is ons ten minste gewaarsku.

S. J. van der Walt.

The Words and Wonders of the Cross deur Gordon H. Girod.
Uitgewers: Baker Book House, Grand Rapids 6, Michigan. 1962.
154 bl. Prys \$2.50.

In 'n twaalfstal preke word Skrifgedeeltes verklaar en toegepas met die sewe kruiswoorde en die wonders, wat met die kruisiging van Jesus gepaard gegaan het, as inhoud.

Die skrywer meen dat nie genoegsame aandag gegee word aan die wonders wat tydens die kruisiging plaasgevind het nie. Soos God met die skepping gespreek het en dit was, so het Hy ook vyf keer gespreek op Golgota en daar was drie-uur lank duisternis, die voorhangsel van die tempel het in twee geskeur, die aarde het gebewe en die rotse het geskeur, die grafte het oopgegaan en baie liggame van die ontslape heiliges het opgestaan. Daar is dus eintlik twaalf „woorde” op Golgota gespreek; sewe deur die Seun, terwyl Hy versoening gedoen het vir ons sonde; en vyf deur die Vader terwyl God die wêreld met Homself versoen het deur Christus. Hierdie twaalf woorde vorm 'n eenheid en moet saam geneem word om 'n omvattende begrip te kry van die gebeure op Golgota.

Die preke is van hoë gehalte. Skrif word met Skrif vergelyk om die diepe betekenis van die gebeure op Golgota na vore te bring. Die rykdom van God se vrymagtige genade spreek met krag tot mens by die lees van elke preek.

Hier en daar kan 'n vraagteken agter enkele besonderhede geplaas word, soos bv. die parrallel wat getrek word tussen Josef se versoek aan die skinker om aan hom te dink as hy herstel word, en die versoek van

die kwaaddoener aan Jesus: „Dink aan my . . .”, p. 24. Of dat Jesus blykens Matth. 27 : 50 'n onverstaanbare geroep laat hoor het voor Hy gesterf het, p. 108. Dit raak egter nie die hoofsaak nie.

Dit is 'n boek wat elkeen behoort te lees.
Bloemfontein.

G. P. L. van der Linde.